

## **Oqaluuserisassanut nassuiaat**

(Inatsisartut Siulittaasuat)

Oqaluuserisassani immikkoortut arlallit ullut suliarineqarfissaasa allangortinneqarnissaat ataatsimiititalianit kissaatigineqarpoq.

Immikkoortup 7-ip: 2024-mut Aningaasanut Inatsisissatut Siunnersuut, pingajussaaneerneqarnissaa novembarip ulluisa qulingannut kinguartinneqarpoq.

Immikkoortup 18-ip: Uunga siunnersuut: Aningaasarsianit akileraarutit pillugit Inatsisartut inatsisaata allangortinneqarnera pillugu Inatsisartut inatsisaat (Sulisitsisup akiligaanik angalanerit akileraaruteqaataannginnissaat, nalikkilliliisarneq pillugu maleruagassanik allanguinerit, amigartoorutit ukiuni tulliuttuni ilanngaatigineqarsinnaanerannik sivitsuineq, selskabit piginnittuusut iluminni nuussisarnerat pillugu maleruagassamik qasukkaaneq, erniat nunanut allanut akilikkat ilaasa akileraarutaannik unerartitsisarnissaq, kapitali 3 b nutaaq, selskabit iluanaarutisariataminnik ilanngaateqarsinnaannginnerannik, iluanaarutisiat ilaasa ilanngaatigineqarsinnaanerannik atorunnaarsitsinermik, iluanaarutisiat ilaasa akileraarutaannik appaanermik aamma selskabit pigisat iluanaarutisariatitaasa ilaasa akileraarutaannik atorunnaarsitsinermik imaqartoq il. il. ), aappassaaneerneqarnissaa pingajussaaneerneqarnissaalu oktobarip ulluisa 26-annut novembarillu ulluisa arfineq-aappaannut kinguartinneqarput.

Immikkoortup 19-ip: Uunga siunnersuut: Nioqqutissanik eqqussuineq annissuinerlu pillugit Inatsisartut inatsisaata allangortinneqarneranik Inatsisartut inatsisaat (Piffissamik akitsuutit akilerneqartussanngorfiannik erseqqissaaneq, imigassanik aalakoornartortalinnik nammineq atugassanik eqqussisinnaaneq, tikinnermi akitsuusiisitsinnaaneq aamma aningaasat atoriaannaat pillugit maleruagassanik allanguineq), aappassaaneerneqarnissaa pingajussaaneerneqarnissaalu oktobarip ulluisa 26-annut novembarillu ulluisa arfineq-aappaannut kinguartinneqarput.

Immikkoortup 17-ip: Uunga siunnersuut: Naligiissitaaneq assigiinngisitsinnnginnissarlu pillugit Inatsisartut inatsisaat, aappassaaneerneqarnissaa pingajussaaneerneqarnissaalu novembarip ulluisa arfineq-aappaannut novembarillu ulluisa qulingannut kinguartinneqarput.

Immikkoortup 61-ip aappassaaneerneqarnissaa oktobarip ulluisa 24-annut kinguartinneqartariaqarpoq. Immikkoortumut isumaliutissiisutigisaminnut iluarsisummik suliaqarnissamut ataatsimiititaliaq pisariaqartitsivoq.

Immikkoortup 61-ip qulequtaraa: Kalaallit Nunaannut suliffissarsiortarneq pillugu Inatsisartut inatsisaata allangortinneqarnera pillugu Inatsisartut inatsisaattut siunnersuummik

saqqummiussinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisissatut siunnersuut nunatsinnut nuuttut kalaallit kulturiannik, oqaasiinik naleqartitaannillu ilinniarnissamat piomasaaqatitalimmik periarfissinneqarnissaannik aalajangersaassaaq. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq. Inatsisissamik piareersaasiarluni suliaqarnerup peqatigisaanik, Kalaallit Nunaanni inuiaqatigiinnut akuusitsilersitsinissamik inatsimmik atulersitsinissaq pillugu Naalagaaffeqatigiinni oqartussaasunut Naalakkersuisut saaffiginnissuteqassapput.

Siunnersuuteqartup oqaluuserisassaatinu immikkoortut 72-itut normulik tunuartippaa. Immikkortup 72-ip qulequtaraa: Avanersuarmi aammalu Tunumi Sumiorpaluutit atuartunit sukumiinerusumik ilisimaneqarnerulernissaat anguniarlugu Meeqqat Atuarfianni ilinniartitsissutit allangortinneqarnissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut.

Immikkoortup 29-ip: Uunga siunnersuut: Meeqqat tapersorneqarnissaannut Inatsisartut inatsisaata allangortinneqarneranik Inatsisartut inatsisaat (Meeqqanut ilaqutariinnullu sullissiviit inatsisitigut tunngavissinneqarnissaat, sulianik suliarinnittarnermut aqqissuussaq digitalikkut ataatsimoorussaq, Isumaginninnermut Aqutsisoqarfiup suliaasaanik erseqqissaaneq il. il.), aappassaaneerneqarnissaa pingajussaaneerneqarnissaalu oktobarip ulluisa 27-annut novembarillu ulluisa arfineq-aappaannut kinguartinneqarput.

Kiisalu immikkoortoq 21: Uunga siunnersuut: Kalaallit Nunaanni pasinapiluttumik kalerriisunik illersuineq pillugu Inatsisartut inatsisaat, UPA2024-mut kinguartinneqarpoq

**Taasisarnerit pillugit uku akornanni isumaqatigiissuteqartoqarpoq:**

Najaaraq Møller, Siumut aamma Jens-Frederik, Demokraatit.